

# ALAHADY BATEMIN'NY TOMPO



## « Tamin'ilay natao batemy iny ny vahoaka rehetra dia natao batemy koa i Jesoa » (Lk. 3: 21)

Ry Kristianina havana, izao Alahady fankalazana batemin'ny Tompo izao no amaranantsika ny fankalazana ny Noely ka hidirantsika amin'ny mandavantaona. Nohalalinitsika nandritra ny noely fa Andriamanitra tsy lavitra ny Andriamanintsika fa eo anivontsika, eo anivon'ny vahoakany. Nandray

Vakiteny I : Iz 40, 1-11

Tononkira : Salamo 108

Vakiteny II : Tito 2, 11-14; 3, 4-7

Evanjely : Lk. 3, 1 5-1 6. 21-22

ny toetrantsika olombelona ankoatry ny fahotana izy ary nahatonga antsika ho zanak'Andriamanitra. Izany no mibaribary amin'izao alahady ankalazantsika ny batemin'ny Tompo izao satria ny batemy dia fantantsika dia ilay fandalovana amin'ny fahotana ka mampiditra antsika amin'ny tena fiainana. I Jesoa amin'ny maha Andriamanitra azy dia tsy manana fahotana nefa noho

izy nanaiky ho olombelona ary tsy mba sarisarin'olombelona dia nanaiky nataon'i Joany Batista batemy, Joany ilay mpanao batemy dia manao fibebahana talohany nanaovany batemy an'i Jesoa. Araka ny fanzavana nataontsika dia tsy batemy fibebahana no nataony tamin'i Jesoa fa famantarana ny maha olombelona azy ka nitondra antsika amin'izay tena batemy ary izany rahateo no ambarany raha nilaza izy hoe *“Izaho no manao batemy anareo amin'ny rano fa ho avy ilay mahery noho izaho ary tsy mendrika hamaha ny fehin-kapany akory aho, izy no hanao batemy anareo amin'ny alalan'ny Fanahy masina sy ny afo”*. Ny batemin'i Jesoa dia manambara an'ilay paka fandalovana, tsy

fibebahana na fiverenana amin'ny Tompo fotsiny fa Paka fandalovana miala amin'ny fiainana tsy mety ao anatin'ny fahotana ambaran'ny fandandevozana (Ejipta) ka miseho mibariabary amin'ny fahafatesana ka mitondra amin'ny fiainam-baovao ka diovin'ilay rano izay manadio sy manome aina ary avaozin'ilay afo mpanavao. Manavao antsika ny batemy ka izany no ambaran'ny batemin'I Jesoa, izany no mahatonga antsika mankalaza ny Batemin'ijeso satria mbola ao anatin'ny fankalazana ny Noely isika, Andriamanitra eto anivontsika, Emanoela I Jesoa, mba hahatonga antsika ho zanak'Andriamanitra. Izany no mahatonga antsika milaza fa ny fankalazana ny Batemin'ny Tompo dia mampiditra antsika amin'ny vanim-potoana mandavataona mba hivelomantsika ny mahazanak'Andriamanitra antsika, hivelomantsika ny batemintsika eo amin'ny fiainana andavanandro izany hoe ilay finoana inoantsika ka mahatonga antsika milaza fa katolika aho. Halaliniko izay hinoako, izay misterin'ny fanavotana mitondra antsika amin'ny Paka, misterin'ny famonjena antsika izay I Jesoa Kristy manolotra ny ainy ka mahatonga antsika mandalo amin'ny fiainana ao anatin'ny fahotana ka mampiditra antsika amin'ny fiainam-baovao. Mahatonga antsika sahady koa entanin'ny Fanahy Masina ka tonga zanak'Andriamanitra, io no lazain'ny evanjely "*Ary nidina teo amboniny ny Fanahy Masina naka endri-batana toy ny voromahailala, dia nisy feo re avy any an-danitra nanao hoe: "Ianao no Zanako malalako, Ianao no ankasitrahiko indrindra"*". Isika rehefa vita batemy ka miditra amin'ny fiainambaovao dia izany no iainantsika sy mahatonga antsika milaza fa katolika aho, iainako izay inoako. Izany no idirantsika amin'ny vanim-potoana mandavantaona izao, hivelomantsika ireo fehinkevitra vokatry ny filankevitra pastôraly, iainantsika ny maha katolika antsika.

Katolika aho ka raisiko an-tànana izay inoako, tsy consommateur intsony isika fa acteur feno, tena tompony isika, izany no dikan'ny batemin'I Jesoa, maniraka azy hitory ny vaovao mahafaly, torak'izany koa isika mandray an-tànana izay hinoantsika izay. Rehefa mandray an-tànana isika dia mankalaza izay inoantsika.

Tsy hoe fahatsiarovana fotsiny ny ankalazaintsika amin'ny litorjia fa noho izy asan'Andriamanitra, noho ny Fanahy masina ary batemy noraisintsika mahatonga antsika miombona amin'I Jesoa dia mankalaza an'I Jesoa amin'ny fiainantsika manontolo isika, izany no litorjia ankalazaintsika ny asan'Andriamanitra, tsy tenintsika samirery ny fankalazantsika noho izany, ny fandraisantsika an-tànana ny finoantsika tsy mikombona ho antsika samirery fa maniraka antsika, zaraintsika amin'ny hafa ny finonatsika. Izany no dikan'izao fankalazana ny batemin'ny Tompo izao. Eo anovintsika Andriamanitra mampiditra antsika amin'ny fiainana.

Ampiatsihiavin'ny Md Paoly amin'ny vakiteny faharoa fa I Kristy no namonjy antsika tamin'ny fanasana nahaterahantsika izany ka nodiovin'Andriamanitra isika ka miombona anjara amin'I Kristy. Tanteraka ilay faminanian'Izaia amin'ny vakiteny voalohany : "*Indro ny tompo Andriamanitrao fa tonga amin'ny heriny izy*". Izany no mahatonga antsika afaka hanambara amin'ny manodidina antsika ny vaovao mahafalin'I Jesoa, tsy hoe fanjakanjakana nafampandriantany na fanerena fa fizoroana ho vavolombelona ary fizarana ny hafalian'ny Evanjely.

Isika no Kristy mpiara-belona amin'olona amin'izao andro ianantsika izao, ny fiainantsika no manambara ny voninahitr'Andriamanitra eo amin'ny manodidina antsika. Izany no maha Kristianina antsika. Ho feno fiadanana isika raha manambara ny famindrampont'Andriamanitra amin'ireo mpiara-belona amintsika. Hoy Izaia mpaminany "*Miakara eny an-tendrombohitra avo ianao, izay*

*mitondra ny teny soa ho an'i Siôna. Manandrata feo mafy ianao, izay mitondra ny teny soa ho an'i Jerosalema; manandrata feo, fa aza matahotra*”, izany hoe aoka tsy hatahotra isika, aza ampidirana ao ampaosy ny finoantsika, aoka isika ho faly amin'ny finoantsika, tsy entintsika hireharehavana, sanatria izany fa fantantsika fa ilay finoana mitondra famonjena, ka mila famonjena ny manodidina antsika, ambarao amin'ny fiainanao izany na dia eo aza ny fanenjehana, ny fahoriana ambarao fa olona voavonjy ianao ao amin'I Kristy. Ny batemy ankalazaintsika dia manambara fa eo anivontsika I Kristy ka velomy izany finoana izany, aoka haninteraka amin'ny fiainantsika ny finoantsika Aoka hahay amin'ny hampitraotra ny finoana sy ny fiainana andavanandro isika.

Ry Jesoa Tompo ô, tonga eto anivonay tokoa ianao, ka amin'izao andro fankalazana ny nanaovana batemy Anao izao no mitodika aminao izahay : Aoka izahay nandray ny batemy ka tonga iray aina aminao, nandray ny famonjena, enga anie izahay ho mpitory famonjena eo amin'ny mpiara -belona aminay. Mila fanavaozana ny fiainanay, enga anie tsy ho batemim-pibebahana fotsiny no niraisinay fa ilay batemy nahatonga anay ho zanak'Andriamanitra, ampio izahay rehetra hiaina sy hanambara ny hasin'ny finoanay izany.

Ry Kristy zokinay ô, Ianao manala ny fahotan'izao tontolo izao, nietry tena ianao ka nanaiky nairanilahatra amin'ny mpanota na dia tsy mpanota aza, raha mandray ny bateminao. IZAHAY KOA NOHO NY BATEMY NIRAISINAY DIA TONGA ZANAK'ANDRIAMANITRA, AMPIO IZAHAY HAHAY HIHAINO NY TENINAO MANDRAKARIVA KA MBA HO ZANAKY NY RAY MARINA TOKOA KA HO GENERATION MPANORINA TOKOA IZAHAY, HO EGLIZY OLONA VELONA, MPANORINA EGLIZY TRANON'ANDRIAMANITRA, HANDALINA NY FINOANAY IZAHAY, HIAINA NY FINOANAY IZAHAY, HANDRAY AN-TÀNANA NY FINOANAY IZAHAY, HANKALAZA NY FINOANAY IZAHAY KA IRAHINAO HIZARA IZANY FINOANA IZANY EO AMIN'NY MPIARA-BELONA AMINAY. Amen

Mompera Arsevka Benjamin Ramaroson